

DEBAGOIENENKO MANKOMUNITATEAN FAKTURAK BIDE ELEKTRONIKOZ **AURKEZTEKO ARAUDIA**

Mankomunitate honek bere helburu nagusien artean du kudeaketa eraginkorrago bat lortzea, bere funtzionamendua hobetuko duena, baliabideak era egokienean erabiliz. Bide honetatik, Mankomunitateak erabaki du hornitzaileen faktura elektronikoak onartzea, bai Gipuzkoako Foru Aldundiak eta bai beste zenbait udalek ere egin duten bezala, aitzindari moduan. Era honetara, administrazio elektroniko baten aldeko apustua egiten da, kudeaketa erraztu eta ordainketa epeak nabarmen murriztea ahalbideratuko duena.

Hornitzaileentzat, bestalde, abantaila handiak eskaintzen ditu. Alde batetik, faktura elektronikoak sortzeko doako software bat eskuragarri jarriko da, guztiz erabilerraza, fakturazio kostuak txikitzea ekar diezaikeena (inprimatzea, paperaren erabilera, posta gastuak, e.a. ekidinez). Bestalde, faktura bat-batean erregistratzen da, eta hornitzaileak berehala jasoko du erregistro horren berri. Azkenik, berehalako erregistro horrek kobratzeko epeak murriztea ahalbideratuko du.

Hori horrela, beharrezko gertatzen da fakturazio elektroniko hau zein baldintzetan emango den zehaztea, hau da, zer formatu izan behar duen Debagoieneko Mankomunitateari bidaltzen zaion faktura elektronikoak, zer baldintza tekniko bete behar dituen, eta zer prozedura erabili behar diren faktura elektronikoa bidaltzeko prozesu orotan.

Ondorioz, honako hau

XEDATU DUT

Lehena. Xedea eta eremu subjektiboa.

Araudi honen xedea da Debagoieneko Mankomunitateari faktura elektronikoak egin eta bidali behar dizkioten guztientzat estandar eta baldintza tekniko uniformeak ezartzea, eta bidalketa egiteko prozedurak eta horretarako beharrezkoak diren zehaztapenak finkatzea.

Bigarrena. Debagoieneko Mankomunitateari faktura elektronikoak bidaltzeko baldintza teknikoak.

Kontratazio administratiboaren esparruan, Mankomunitateari zuzendutako faktura elektronikoen jatorriaren benetakotasuna eta edukiaren osotasuna sinadura elektroniko balioztatua erabiliz bermatu behar dira, sinadura elektronikoa arautzen duen abenduaren 19ko 59/2003 Legeak 3.3 artikuluan jasotakoari jarraiki.

Faktura elektroniko horiek «Facturae» formatua izan behar dute. Honi dagokionez, Udalgida web orrian, www.udalgida.net helbidean, kontsultatu ahal izango da «Facturae» formatuak une bakoitzean erabilgarri dituen bertsioei buruzko informazioa.

Sinadura elektronikoaren formatuak zehaztapen hau bete behar du: XML-Advanced Electronic Signatures (XAdES), ETSI TS 101 903. XAdES formatuaren 1.2.2 eta 1.3.2. bertsioak erabili ahal izango dira. Sinadurak XAdES-EPES eta XAdES-XL luzapenak izatea onartuko da.

Aurreko paragrafoetan jasotako formatu eta zehaztapenak bete gabe Udalari bidaltzen zaizkion faktura elektronikoak errefusatuta geratuko dira.

Hirugarrena. Mankomunitateari faktura elektronikoak bidaltzeko prozedurak.

1-. Bi modutan bidali ahal izango dira fakturak:

a) Fakturazio elektronikoaren web zerbitzuari deituz, protokolo seguru baten bitartez. Ondorio hauetarako, Udalgida web orrian argitaratuko da deitu beharreko web zerbitzuaren URL helbidea.

b) Posta elektronikoa erabiliz. Ondorio hauetarako, faktura elektronikoak postari erantsiko zaizkio, eta ondoko helbide elektronikora bidaliko dira: udal_fakturaelektronikoak@gipuzkoa.net.

2-. Faktura jaso ondoren, mezu baten bitartez bidaltzaileari adieraziko zaio faktura onartu den edo errefusatu den.

3-. Xedapen honetan jasotako prozedura eta zehaztapenak bete gabe Mankomunitatera bidaltzen diren faktura elektronikoak bidali gabekotzat hartuko dira.

4-. Udalgida web orrian fakturazio elektronikorako doako software bat izango da eskura, interesdunek faktura elektronikoak egin eta bidal ditzaten.

Laugarrena. Faktura elektronikoak hornitzaileei itzultzea.

Fakturan jasotako gastuaren ordainketa bidezkoa ez denean, Mankomunitateak hornitzaileari itzuliko dio formatu elektronikoan bidalitako faktura, eta adieraziko dio zer arrazoi argudiatu dituen hura itzultzeko. Itzulketa bide telematikoz egingo da, faktura elektronikoa Mankomunitatera bidaltzeko unean bidaltzaileak adierazitako helbide elektroniko berbera erabilita.

Bosgarrena. Fakturen erregistroa.

Uztailaren 5eko 15/2010 Legeak, merkataritza eragiketetako berankortasunaren kontrako neurriei buruzko abenduaren 29ko 3/2004 Legea aldatzen duenak, 5. artikuluan ezartzen duenez, udal entitateek erregistro bat sortu behar dute, kontratistek egindako fakturak bertan jasotzeko. Ondorio horretarako, mankomunitate honetan sarEko aplikazioko Fakturen erregistroa izango da aipatutako legeak exijitutako erregistroa.

EGINBIDEA.- Araudi hau Mankomunitateko Gobernu Juntak onartu zuen, 2013ko uztailaren 18an egindako bilkuran.

Arrasaten, 2013ko uztailaren 19an. IDAZKARIA